



ATASSUT

7. 10. 2020

Siverth K. Heilmann

UKA 2020/24

Uanga siunnersuut: Illuliortiternernut aningaasalersuineq pillugu Inatsisartut inatsisaata allangortinneqarnissaa pillugu Inatsisartut inatsisaat nr. xx, xx. xxx 2020-meersoq. (Nutaanik inissialiornissamut taarsigassarsiaritit taamaallaat inunnut taarsigassarsiaritinneqartassapput aammalu inuit inissiamut ataatsimut taamaallaat taarsigassarsisinnaallutik)

(Ineqarnermut Attaveqatigiinnermullu Naalakkersuisoq)

Naalakkersuisut illuliortiternernut aningaasalersuineq pillugu Inatsisartut inatsisaata allangortinneqarnissaa siunnersuut pillugu imatut Atassummiit oqaaseqarfigissavarput.

Atassutip pingaartitaanut ilaalluinnarpoq, inuit namminerisaminnik illuuteqarsinnaanerit periarfissaqartuaannarnissaa, piginneqatigiilluni illuliortarnerup ingerlaannarnissaa, suliffeqarfiit namminerisaminnik sulisuminnulluunniit inigisinnaasaannik sanaartortitsisarnissaq kiisalu pisortat inissialiortitsisarnerat pitsaasunik akinullu naleqquttunik ineqartitaasarnissaat.

Illuliortiternernut aningaasalersuineq pillugu Inatsisartut inatsisaanni nr. 39, 23. November 2017-imeersumi, Inatsisartut inatsisaanni nr. 36, 28. November 2019-imeersumi allangortinneqarnikuusumi, Naalakkersuisunit saqqummiunneqartoq iluarseriarneqalerpoq sulili tusarniutini uparuaatigineqartuni tupinnangitsunik isornartoqartinneqarnera maluginngitsuugassaangilaq.

Inatsisartuni eqqaamaneqassaaq, siornatigut inigisamut iluarsartuussinissamut INI A/S-imit, 100 tkr tikillugit piumasaqaatit naammassinnissimasut taarsersugassaangitsunik atorluarneqaannarani iluarisimaarneqarluartumik ingerlasoqarnikummat. Aningaasaliissutaasartulli 300 tkr-inuit qaffanneqarmata piumasaqaatit akisussaaffiillu kommuune-nut akisussaaffinngortinneqarmata, aporfissat ajornartorsiutillu takkussuutilerput. Taassuma takutiinnarpaa suli pisariaqartoq akisussaaffimmik nuussinermi ajornartorsiutit pinngorsimasut aaqqissallugit.

Soorlu inatsimmi § 33 aamma § 34-imi piumasaqaatit najugaqartunut sanaartortullu suliamik aallartitsiiniartarnerat kommuunet ilaanni kinguarsaatinngorsimavoq, allaallu sanaartortussat suliassaminnik tiguisinnaanerit aporfissarpassuaqalersimalluni. Suliffeqarfik neqeroortoq kommune-mit akuerisaasoq akiitsoqarfigineqarsimanertilli pillugu suliamik aallartitserusunngitsut, ineqartut siviisuumik utaqqilussinneqarnerannik kinguneqartumik. Sanaartortut sanaassaminnut namminneq akileeqqaartalernertik naammassigunillu aatsaat akiliisoqarsinnaanera ilungersuatitsisunut ilaavoq.



Aap uani Naalackersuisut §§ 9, 11, 27-ilu naleqqussarniarlugu inatsisartunut saqqummiivusi. Tusarniaasoqarneranili paasinarsivoq, siunnerfiusoq arlalippassuartigut isorineqartoq maluginngitsoorneqarsinnaangilaq, taamatullu isummersorneq pingaartumik akisussaaffinnik kommuunenut naleqqussaaniarnerigaluagut, ilumut piviusorsiortuunersut qulakkiissallugit paaseqatigiilluarnissarlu pingaaruteqarluinnarpoq.

Namminerisaminnik illutaartartut, allarniuteqartarnermik saniatigut, imatut paasisarpaat, tassa pisortanut akileeqqissanngilagut, erniaqanngitsunik taarsersugassaanngitsunillu akuerineqartutut allagarsiaqarnertik tunngavilersuutigineqartarpoq, piviusorli akilersuinissamut pisussaaffeqarnek allaalluinnarpoq.

Taamaammat Naalackersuisuugutta inatsisartuuguttalu, inatsisiliagut tamanut paasiuminartuusariaqarneri pingaaruteqarmat, Atassummiit inassutigissavarput, suliap aappassaaneerreqartigani ataatsimiititaliami susassaqartumi tusarniaanermi uparuaataasut, inatsisartunilu partiinit oqartuutigineqartut pillugit nalilersuilluartoqartariaqartoq.

Qujanaq